

欽定剿平粵匪方略

欽定勦平粵匪方略卷二十一 壬子年

十二月初一日

丙子

上命軍機大臣傳諭徐廣緝常大淳張亮基曰前廣西
賊匪竄出湖南降旨令湖南分設糧臺並命程矞采
專辦糧臺事務現在賊由湖南復竄湖北該督撫等
已派衡永郴桂道張其仁帶同各糧員隨營前往所
有軍營糧臺自應移設湖北惟此時武昌被圍徐廣

縉駐紮尙無定所糧臺應設何處著徐廣縉常大湧
張亮基會同酌量辦理仍著程裔采前往總司其事

初二日 丁丑 陸應穀奏言賊匪攻圍湖北省城勢

甚猖獗驛路不通該省防禦喫緊連日未得湖
北文報正飭確探接署信陽州宣維祁稟稱探
聞賊匪於十一月十三日攻陷漢陽府城將漢
日及江面用船搭造浮橋圍住省城七門並有

分股直下黃州之語現在向榮已至距江夏六十里地方追勦大獲勝仗殺賊二千餘名並稱湖北應山以下孝感黃陂黃岡等處驛路梗塞黃陂一帶俱有賊營距信陽州僅三百餘里若竄至荊襄又與南陽一帶偏近所謂鄰省官兵除西安兵頭起將到洛陽外餘俱無到省確期相應請

旨飭下直隸山東山西陝西督撫諸臣迅將所調官兵
飛速催趨來豫俾資調撥奏入

上命軍機大臣傳諭琦善陸應穀曰賊匪竄踞漢陽府
城圍住武昌省城湖北應山以下孝感黃陂黃岡等
處驛路梗塞豫省防堵甚爲喫緊著琦善速卽兼程
帶兵馳往河南湖北交界處所擇要防勦琦善未到
以前著陸應穀盡心妥籌毋稍貽誤至湖北文報旣

由該署撫改道飛遞著卽通飭各該州縣改設驛站
小心遞送

上又命軍機大臣傳諭舒興阿張祥河李愬郭夢齡曰
前因河南防堵緊要已有旨諭令該督撫等將前調
陝甘山東山西等省官兵迅派得力將弁管帶馳往
河南聽候調遣茲據陸應穀奏賊匪竄至漢陽逼近
河南著舒興阿張祥河李愬郭夢齡迅飭帶兵將弁

管帶前調精兵星速馳赴河南以資防勦

上諭內閣曰逆賊攻陷漢陽府城旋占江面直撲武昌現在向榮追勦大獲勝仗福興玉山蘇布通阿等統帶大兵計亦次第趕到著徐廣縉卽督率諸將迅埽賊氛向榮經朕破格任用並假以事權提鎮以下悉聽節制自當愈知感奮速解省城之圍並杜賊紛竄之路陸建瀛琦善南北兩路已令進兵合擊至各省

紳士朕先後降旨命羅繞典陳孚恩曾國藩等於本
籍湖南江西幫辦防勦事宜其餘各省在籍紳士諒
必志切同仇爲民捍患著該督撫傳旨令該紳士等
各就該地方情形幫同團練保衛鄉閭或用堅壁清
野之法使賊不能擄掠偏脅一切布置經費應由公
正紳士籌辦不得官爲抑勒該督撫等惟當遴選賢
能之員與各紳民同心協力嚴緝土匪密拏奸細以

杜勾結被賊裏脅窮民皆吾赤子尤當分別良莠予
以自新有能殺賊立功自拔來歸或殲擒賊首者立
卽奏明優加恩賞朕宵旰焦思誓必殲此羣兇綏我
黎庶封疆文武大吏其各仰體朕心毋負委任將此
通諭知之

同日

上命軍機大臣傳諭祥厚陸建瀛楊文定霍隆武文藝

曰逆匪竄入漢陽沿江一帶防禦喫緊江南省城尤
爲重要必應籌備嚴密乃可杜賊匪之覬覦著祥厚
陸建瀛楊文定霍隆武文藝妥速籌商無論駐防綠
營水師各官兵遴派得力將弁一體勤加操演務令
悉成勁旅以衛省垣並於江岸上游擇要嚴防扼賊
東下之路至逆匪所到輒先有奸細潛來窺探尤當
嚴密盤查審明後卽行正法以杜勾引其紳士人等

莫不自顧身家著遴選公正明幹之員令其自行團練互相保衛如有實心任事於地方有益者隨時奏請優加獎勵所需經費出於樂輸毋許地方官藉端勒派淮徐各處每有匪徒匿跡並著認真訪查嚴行緝捕免致勾結爲患

同日

上諭內閣曰前有旨令吉林黑龍江各備精兵候旨調

撥著固慶等卽飭令前經保舉之協領台斐音保等
管帶前調馬隊精兵二千名馳赴河南其黑龍江前
備馬隊精兵二千名著英隆等迅派將領數員統帶
起程到京後卽著協領巴揚阿等管帶馳赴河南一
併交琦善酌量調遣

初三日戊寅 蔣文慶奏言臣探知湖北漢陽府失

守安省距漢陽祇隔黃州一府兵單斷難防禦

惟望各省援兵不日來皖兵民協力庶幾戰守
有資第浙江山東距皖較遠急切未能應手查
江省兵額五倍於皖督臣卽須帶兵親赴上游
扼守兵力仍屬有餘若必舍近調遠臣恐民無
固志皖城根本重地兵不滿千何以爲守懇
飭督臣迅將調防水陸兵三千名星夜飭派來皖至本
省將弁曾經出仗者前已調赴各省協勦現熟

諳戎務者止壽春鎮總兵恩長一人可與臣商酌調度頃於十一月二十七日到省可否仰懇

天恩准留皖省俾各將有所稟承一俟援兵到齊臣卽

先擇陸路要隘令恩長帶兵迎頭攔截以防竄

越奏八

上命軍機大臣傳諭陸建瀛蔣文慶曰安徽前調防兵業經陸建瀛於松江等處酌調水陸兵二千名赴皖

茲復據蔣文慶奏待援緊急著陸建瀛再行撥兵一千名迅赴皖省交該撫酌量分撥壽春鎮總兵恩長卽留該省與該撫會商籌辦帶兵防勦陸建瀛著仍遵厯次諭旨兼程馳赴九江上游擇要駐紮遏賊東下之路

同日徐廣縉奏言臣接據漢川縣報稱賊匪於漢陽之大別山及漢鎮均經紮營占踞又於襄

河之小河口謝家嘴等處搭造浮橋並於武昌
之塘角泊有船隻連亘數里勢甚狼狽聞之不
勝憤懣查常祿王錦繡之兵已馳抵省城向榮
等各隊大兵亦陸續到齊併力夾擊臣又飛派
蘇布通阿督帶川兵迅速渡江由上游漢汚等
處一面截堵一面分防趕緊將此股埽滅庶可
鎮定人心至各鎮將追勦不力種種貽誤誠如

訓諭飾詞稟報一味耽延臣查賊於十月十九日竄出
其防東路之和春秦定三李瑞經文岱王錦繡
常祿等並由臣檄調忽於二十一日帶兵齊赴
湘潭臣以賊已西竄何以兵轉南來當卽申飭
令其拔隊緊追並慮及匪必東竄岳州喫緊臣
探聞匪至益陽卽知會向榮派兵往堵隨又札
飭和春秦定三李瑞經文岱瞿騰龍由小路馳

往大荆攔截以防匪竄岳州乃該總兵等於二十八日接札初三日始抵大荆而賊匪已於初二日竄過實屬有意遷延讓賊北竄其大隊追勦之兵惟向榮尙知愧奮繞道前行其餘將弁均不免遲延觀望尤可恨者福興所帶東兵向來尙稱得力自歸該提督統帶頓染惡習一味推諉不前臣前因查察未晰且以用人之際若

概行叅奏又恐統帶無人致涉遲疑昏憒糊塗
罪無可逭現在調集兵勇趕緊將巴陵一帶土
匪勦滅卽確探賊蹤前往督勦斷不敢再爲遲
滯辜負

聖恩自干嚴譴奏入

上命軍機大臣傳諭徐廣縉向榮曰據徐廣縉馳奏軍
營近日情形覽奏曷勝憤懣軍營將弁以及地方文

武膽玩至於此極該大臣身爲統帥正當用人之際
雖不能概行叅奏亦當擇尤懲辦以儆將來岳州府
城賊旣竄出是否收復何以並未奏及該府爲兩楚
咽喉該大臣旣不能卽赴武昌亦豈可置之不顧昨
據陸應穀馳奏賊匪攻陷漢陽圍撲省城已降旨命
向榮幫辦軍務徐廣縉現尙未抵武昌軍營一切情
形卽著向榮隨時奏報

同日刑部奏言遵

旨速議失守岳州府城各員罪名此案已革岳州營參

將阿克東阿係岳州府城武職已革巴陵縣知

縣胡方穀係屬守土州縣已革岳州府知府廉

昌係屬同城知府該革員等於賊未至之先輒

自逃散以致岳州府城失陷較之被賊攻圍不

行固守及守備不設被賊掩襲者情罪尤爲重

大臣等應卽比律分別加重問擬阿克東阿係專城武職胡方毅係守土州縣均應比照盜賊攻圍不行固守而棄去被賊攻陷城池專城武職守土州縣擬斬例擬斬監候請

旨卽行正法以照炯戒廉昌係同城知府按例罪應邊遠充軍向止加發新疆與阿克東阿等本罪應擬斬候者不同惟該革員與知縣同守要區兵

力並不單弱乃不督率屬員嬰城固守竟於賊匪並未攻圍之時先期逃散自應比律從重問擬廉昌應比照守邊將帥不行固守而輒棄去因而失陷城寨擬斬律擬斬監候秋後處決以上各員均係官犯仍恭候

欽定查徐廣縉原奏內稱該府縣如何下落尙未據稟報現在該府縣等究竟如何下落應由該大臣

迅速查明遵

旨辦理奏入

上諭內閣曰已革湖南岳州府巴陵縣知縣胡方穀已革岳州營參將阿克東阿於賊匪未至之先輒自逃散以致使城失守情罪尤爲重大自應按律加等治罪胡方穀阿克東阿均著照部議卽行處斬已革湖南岳州府知府廉昌係同城知府乃不能督率屬員

嬰城固守竟於賊未攻圍之時先期逃出亦應比律
從重問擬廉昌卽照部議應斬著監候秋後處決該
員等尙無下落著徐廣縉等迅卽查明遵旨辦理

初四日

己卯

上命軍機大臣傳諭徐廣縉陸建瀛琦善向榮曰逆匪
猖獗疊陷城池朕以徐廣縉總制兩粵素有威望特
命爲欽差大臣署理湖廣總督督勦賊匪是朕之倚

界甚重乃因鎮將不遵調度輒請另簡重臣豈身任
兼圻統制軍務尙不得爲重臣耶當此防勦喫緊之
際軍情日夕變遷又何能遽易生手更致呼應不靈
頃命向榮幫辦軍務仍補授廣西提督不特向榮當
知感奮力圖報效卽該大臣亦得指臂之助但須同
心合力嚴申紀律督率諸軍迅勦羣醜又何必遲疑
退諉另請簡員耶所有湖南北兩路勦賊事宜卽責

成徐廣縉向榮二人專辦江蘇安徽江西毗連湖北各要隘責成陸建瀛妥爲布置仍令於上游扼要堵勦其河南各要路卽責成琦善帶兵進攻琦善昨已起程著仍遵前旨兼程前進毋稍延緩朕所以命陸建瀛琦善爲欽差大臣者以湖北賊勢猖獗當其下游則江西等省最爲喫重防其北竄則河南信陽新野一帶亦甚緊要不但自固藩籬必當出境合勦該

大臣等膺此重任務宜度地相機互爲聲援或密行
札商約期會勦三路並進賊縱狼狽亦有應接不暇
之勢前之被賊牽掣者今卽以之制賊徐廣縉等雖
各分各路所辦實祇一事斷不可稍存疆界之見總
期勠力同心聲勢聯絡若何路致賊竄逸朕惟何路
大臣是問果能出奇制勝迅奏膺公朕必加以懋賞
若但知設防不圖進攻鄰省設有疏虞本境亦豈能

自固老師糜餉伊於胡底該大臣等接奉此旨其各仰體朕意和衷共濟凜之勉之

上諭內閣曰昨據徐廣縉奏軍營近日各情形實出情理之外徐廣縉身爲統帥節次諭令如有抗違軍令者卽將朕賜遞必隆刀以軍法從事乃以人多礙難叅奏自認昏憒糊塗於事何濟此等將弁喪心昧良卽盡予斥革治罪亦屬咎由自取惟現值派委追勦

賊匪之時若令置身事外轉得遂其貪生畏死之私
除王錦繡常祿帶兵救援武昌現已馳入省城守禦
姑從寬貸外福興有心推諉厥咎尤重著先行革職
留於軍營交向榮差遣委用帶罪自效和春秦定三
李瑞經文岱瞿騰龍均著先行革職留任仍責令勦
賊以觀後效朕思軍營積玩惡習皆由該大臣等含
忍姑容又復代爲彌縫以致號令不行毫無忌憚現

在賊氛肆擾兩楚地方吾民顛沛流離死者不知凡
幾卽將弁兵丁出力打仗者亦傷亡相繼而若輩仍
復逍遙觀望自便身圖縱寇殃民實堪痛恨若不按
律懲辦何以除錮習而振軍威嗣後該大臣等均當
申嚴紀律如再有玩誤軍令不遵調度及帶兵藉詞
遷延縱賊竄擾或守土文武遇賊棄城逃散者卽一
面奏明一面先行正法昨已降旨將失守岳州之知

縣胡方穀參將阿克東阿卽行處斬知府廉昌亦定爲斬監候矣該大臣等卽傳諭軍營將士及地方文武等力洗前愆共圖振作儻仍因循不悟阿克東阿等卽前車之鑒勿謂國典可倖逃也將此通諭知之

同日

上諭內閣曰前命徐廣縉由湖南間道疾趨武昌以解省城之圍並命陸建瀛溯流直上扼守九江上游琦

善統帶重兵兼程前赴楚豫交界三面合勦陸建瀛
琦善以鄰省督撫分路赴楚合勦不免限於疆域未
能號召諸軍會籌夾擊著頒發欽差大臣關防兩顆
分交陸建瀛琦善祇領陸建瀛卽督率水陸官兵駛
赴大江上游飭屬將各險要妥爲防守卽可直抵楚
省應援武昌琦善計已早過保定所有前調官兵迅
卽催赴河南將南汝光等處要隘布置防守仍卽統

兵出境進攻與湖北向榮等所帶大兵合力勦賊徐廣縉卽當親赴武昌一帶與陸建瀛琦善水陸兜圍萬不可各存意見致誤事機該大臣等務期同心勦力迅奏膚公毋負委任

初五日庚辰直隸總督訥爾經額署河南巡撫琦善直隸提督陳金綬奏言臣琦善行抵保定省

垣會同臣訥爾經額臣陳金綬催提在後各路

官兵前進查賊情詭計多端圍長沙而旋陷岳
州攻武昌而先踞漢陽聲東擊西是其故智其
間改裝設伏勾結內應狡譖自不待言現在南
陽信陽二處已奉

旨飭派柏山鄭敦謹分路籌防而漢陽以北黃州麻城
一帶暨九里等關偏近豫省光州處處有小路
可通逆匪或假扮客商或詐爲難民先行潛入

各府州縣城內以爲內應必致內外受敵易於失事又現調各省征兵與豫省弁兵均未謀面該匪或詐爲援兵或假稱軍營差兵與我兵佯爲款接俾令猝不及防肆其戕害其他或假作乞匁夤夜放火或假充夫役誑擡器械甚或黑夜假稱上官詐令開城託詞寄物暗藏信礮官兵曾屢受其害必須多派明幹之員改裝易服

節節密探俾賊匪之動作我悉先知彼由何路
而來我得扼要抵禦迎截抄擊庶可不落其後
至各處河口渡船應悉收歸北岸派員嚴督兵
役防守俾賊匪無可濟渡我得隨時調用方爲
受制於我再懷慶衛輝等處均爲南北衝要門
戶各宜選派曉事之員會督本管地方文武加
意嚴防以上各情詳晰函商現署撫臣陸應穀

酌覈籌辦臣琦善一面發摺卽行前進臣陳金
綬亦已行抵保定截至本月初四日查得催過
保定各官兵共二千名由臣琦善督飭趨行其
續到官兵卽由臣陳金綬管帶前往臣訥爾經
額日事嚴催務令趕緊到齊飛速進剿奏入
上諭曰琦善現已授爲欽差大臣軍中有所統率自可
相機調度一切緩急朕斷不遙制陳金綬忠誠素著

勇敢無敵戰陣之事可與商酌現在營員中經戰者甚少大半皆怯懦之人陳金綏雖精力未衰究不宜使之在前朕不放心殄茲羣醜卽在此舉朕惟有竭誠籲

天以消民劫也

同日

上諭內閣曰正黃旗蒙古副都統明慶正白旗漢軍副

都統德崇額鑲紅旗蒙古副都統忠泰御前頭等侍衛穆克登額乾清門頭等侍衛德興阿察哈爾都統西凌阿均著帶領吉林黑龍江官兵前赴河南軍營聽候琦善調遣

初九日甲申徐廣緝奏言臣查大營兵勇全赴武

昌逆匪於十一月十三日到武昌城外東南西三面俱紮有賊營又於長虹橋隔港屯踞以阻

我進剿之兵向榮趕到後紮營於白木嶺十七
日親督頭隊由長虹橋直抵賊營開放槍礮該
逆分隊抗拒和春秦定三李瑞之兵亦卽出隊
分投攻擊從辰至未轟斃賊匪多名斬獲數十
名兵勇亦陣亡二名受傷四十餘名至巴陵一
帶土匪亟須剿洗當派阿勒經阿鄧紹良帶兵
攻剿並派知府江忠源帶楚勇協剿查得黃復

灘梁夫峴隆奉菴等處均係匪巢該員逐一搜
捕並將匪巢燒燬鄧紹良等在新牆紮營步步
進逼斃賊甚多擒獲要匪趙捷權等四名均係
晏仲武死黨曾受洪逆僞職二十四日督兵偏
近賊巢駐紮二十五日阿勒經阿鄧紹良督率
兵勇分三面進攻並豫派遊擊鮑雲翥駱永忠
等帶湖北弁兵抄由賊巢後山梁壓下我兵行

抵該處對準賊巢開放槍礮一鼓齊進擊斃黃
衣賊目餘匪紛紛倒地兵勇乘機焚燒賊巢房
屋衆匪慌亂竄逃當被大兵砍斃無數生擒賊
匪晏七等五十七名惟時首匪晏仲武已改裝
逃遁當經遊擊駱永忠都司許連城等奮力追
捕至紅橋地面拏獲訊供該犯於道光二十八
年卽在廣西投楊秀青入會受僞提督之職訊

明後恭請

王命處以極刑餘匪分別梟決此次勦洗土匪員弁
尙能出力可否容臣酌保數員以示鼓勵奏入

上命軍機大臣傳諭徐廣縉向榮曰省垣被圍日久內
外文報不通不堪再事遷延向榮業經趕到武昌直
抵賊營著與諸將妥速籌勦當接仗獲勝之後士氣
倍奮務須趁此機會竭力殲除能與城內拒守官兵

出奇接應水陸兩路節節設伏要擊不令該匪順流
下竄尤爲周密軍情變遷不一全在該大臣與向榮
等戮力同心相機辦理迅速布置朕斷不爲遙制前
有旨令蘇布通阿與向榮合力勦賊嗣據該大臣奏
稱欲令其渡江遏賊竄往荆襄之路不知此時究竟
如何調遣總當察度緩急毋誤事機前諭羅繞典馳
赴荆襄扼要駐守此時曾否奉到諭旨前往台湧督

防荊州西路能否兼顧該大臣須通盤籌度不可顧此失彼蘄黃以下水陸各要隘萬不可令賊奪險東下又滋蔓延開隆阿業經由江西折回湖北該侍衛係吉林人若令管帶吉林官兵較可得力該大臣卽飭該員前赴河南交琦善酌量差遣至巴陵餘匪如安仁之李能通監利之張添佑及湖南地方各股零匪卽著督飭地方在事文武實力搜查淨盡務絕根

株

上諭內閣曰逆匪圍撲武昌向榮趕到後紮營白木嶺
福興玉山蘇布通阿馬龍等續到之兵徑趨武昌東
門十一月十七日向榮親督頭隊由長虹橋直抵賊
營開放槍礮和春秦定三李瑞等分投攻擊轟斃賊
匪多名斬獲數十名該大臣等卽督飭鎮將相機進
剿迅解武昌之圍至巴陵土匪晏仲武等經徐廣縉

派阿勒經阿等帶領兵勇勦辦匪首晏仲武經遊擊
駱永忠等拏獲該匪等均受僞職爲賊後應罪大惡
極業已明正典刑埽其巢穴該大臣卽統帶重兵前
進將臨湘蒲圻一帶土匪乘勢勦洗直抵武昌與向
榮等迅殄羣醜此次出力員弁著酌保數員候朕施
恩

徐廣縉又奏言廣西逆匪竄入楚疆攻陷道州

江華等州縣竄撲省城勢甚猖獗調集河南四川江西陝西貴州福建廣東及湖北湖南各省官兵招募鄉勇合力圍剿並前大學士臣賽尙阿暨臣先後欽遵

諭旨來楚督辦所有京城滿營官兵鹽菜口糧騎駝馬折給夫價四川及本省屯土官兵跟役鹽菜口糧騎馬折夫本省綠營官兵鹽菜口糧駝馬

口糧折夫官兵借支行裝銀兩例馬草料鄉勇
坐餉號衣器械安設隨營糧臺步塘腰站夫馬
雇募站夫長夫水陸兩路運送軍火餉糈製造
軍火器械辦差文員騎駄馬匹採買米石文員
支給鹽菜口糧陣傷官兵賞項採買馬匹雇用
民馬撫恤難民犒賞士卒水陸兩路應付夫馬
船隻解送軍營馬匹及一切物件隨營長夫搭

蓋棚廠棲止軍營辦理各站各員隨帶書識支
給安家行裝軍營差赴京城官員差解大營紙
張筆墨藥料等物調赴軍營各項匠役軍營官
員跟役給與帳房擡送礮位人夫調赴軍營醫
士動用軍需銀兩查扣餘平賞給投誠鄉勇人
等項糧臺應用倉夫斗級軍營亡故官員回籍
陣傷亡故及在途病故兵丁骨殖回營投誠人

等情願隨營進剿效力應給鹽糧軍需公局經
書辛工銀兩等項已經前督臣奏請設立長沙
永州兩局並在衡州安設支應局行營糧臺調
派各員經理臣伏查兩粵匪徒滋事首尾三年
湖南籌防籌勦本省兵力不足調撥外省官兵
協濟又因官兵徵調需時不得不招募鄉勇以
資攻守各屬山多路歧要隘實繁自應擇地防

欽定四庫全書
卷二十一
守迨至調募兵勇爲數既多餉項因而增費歷時旣久用廣費繁本省歷辦軍需均係因地制宜有爲軍中所必需而省之無可省者自應斟酌損益因時變通辦理茲據辦理湖南糧臺軍需總局布政使潘鐸等將此次軍需支發或遵守定例或參成案酌覈事宜造具清冊會詳請奏前來臣覆加查覈均屬實情伏祈

皇上飭部覆施行奏入得

旨該部速議具奏旋經戶部分別准駁議覆得
旨允行

十一日丙戌蔣文慶奏言探聞粵匪現踞漢陽漢

口爲巢穴於江面上下游搶擄船隻搭造浮橋
直接湖北省城以通往來復於省城屯紮賊營
數處作圍攻之計匪勢日形猖獗現在九江已

有陸建瀛督帶水師扼守萬一該逆從黃州陸路下竄甚爲可慮查鄂省北界河南南界江西河南之信陽州有平靖關天生險隘聞已派兵守禦逆匪勢難北竄江西有九江屯駐重兵扼守足以制南竄之路惟東過黃州數百里內無險可扼刻下黃州居民早已遷徙一空賊匪豈無偵探乘虛直竄是其長技與黃州緊接者爲

安徽如英山霍山太湖宿松等縣處處毗連卽就宿松一縣言之連界共有八處四處尙有山隘可守其餘四處皆一路平衍不能不分兵防禦而省城根本重地又豈能全不設備小孤山爲水路入皖門戶形勢原屬可恃無如冬令乾旱江渚悉成平壤賊若舍舟登陸由北岸則直抵安省由南岸則遙連江南安得如許重兵層

屢堵截臣愚以爲賊匪由粵西以至湖南湖北
本省尾勦有兵鄰省防堵有兵而賊蹤所至立
卽潰陷者無他由無重兵抄出其背故也惟有
徐廣縉急分大兵一萬名由湖北沔陽州間道
以至孝感黃陂潛出漢陽之後上游有徐廣縉
督帶大兵圍勦武昌漢陽下游又各有重兵堵
截迎擊先焚浮橋以斷漢陽往來之路截賊爲

二使其首尾不能相顧庶可一鼓蕩平奏入

上命軍機大臣傳諭蔣文慶曰陸建瀛諒已馳抵安慶
該撫卽會同籌商省城尤當扼險防守毋任該匪竄
八

上又命軍機大臣傳諭徐廣縉向榮曰逆匪現踞漢陽
漢口爲巢穴我軍均在江南若遴選精兵由湖北汎
陽間道至孝感黃陂潛出漢陽之後直擣巢穴亦出

奇制勝之舉著徐廣縉向榮體察地方情形密速迅
辦逆匪大股既在水路亟應設法火攻並焚其浮橋
截賊爲二使其首尾不能相顧並咨陸建瀛會同夾
擊互相策應再襄陽荊州一帶係陝豫兩省門戶最
關緊要羅繞典前赴防堵此時曾否馳往卽酌帶官
兵與台湧會籌辦理並與河南南陽駐守帶勇文武
大員及陝西接壤處所隨時知照互爲接應不可稍

分畛域

上又命軍機大臣傳諭陸建瀛曰逆匪紛竄湖北圍撲武昌疊經諭令陸建瀛兼程馳赴九江上游一帶迅籌江防遏賊東下之路現在該大臣行抵何處水陸各要隘如何設防文武員弁所用何人諒已一一籌辦惟聞賊匪擄船甚多若被勦順流東竄則江西安徽等處萬分喫重陸建瀛前已計及於九江水陸上

游扼要布置著卽迅速馳往將籌勦各事宜由六百里馳奏以慰朕懷該匪現踞漢陽將武昌漢口俱搭浮橋三面接應省城勢甚危急向榮等援兵先後已到武昌若能渡江直擣賊巢水陸並進陸建瀛張芾等復於九江上游要隘派兵前後夾擊使賊首尾不能相顧自可稍挫逆鋒儻逆匪捨船登岸分擾黃州一帶則陸路與安徽接壤處處可虞亦必須先期擇

險設伏要擊方能互相策應若賊匪下竄黃蘚一帶
我之水師旣須防其火攻且可設法用火燒賊船隻
或倣古人柴荻灌油繫走舸於船尾之法行之但必
宜暗藏港汊俟賊船過後繞出上游順流東下方可
得手陸建瀛於楚北水陸地勢素所深知著卽通盤
籌畫與徐廣縉向榮互相知會毋得稍分畛域致誤
事機

十二日丁亥

上命軍機大臣傳諭舒興阿曰逆匪占踞湖北漢陽攻撲武昌所有東南北三路疊派欽差大臣徐廣縉陸建瀛琦善各帶重兵分道進剿深恐該逆被創西竄則襄陽間道可以直達商州其鄖西鄖縣竹山竹溪等處路徑叢雜隨處可通現派羅繞典馳赴襄陽一帶與荊州將軍會籌防勦必須鄰省聲勢聯絡方不

致有疏虞著舒興阿卽日酌帶官兵迅速馳往陝西
與湖北接壤處所察度形勢擇要嚴防務須隨時督
飭地方文武員弁嚴密稽查勿使奸細闖入或假作
楚省難民與南山無業之徒潛相勾結所有一切調
度著該督撫會商督辦一面飛咨新任陝西提督桂
明迅卽赴任仍須妥慎籌辦不可先事張皇致擾居
民

上諭內閣曰欽差大臣兩江總督陸建瀛著加恩賞還
頭品頂戴

十三日戊子陸應穀奏言探聞逆匪自占踞漢陽
後竄至黃陂灘口地方經提臣向榮督同張家
祥帶兵追至東湖驛殺賊二千餘人並將該匪
所搭浮橋燒斷逆匪竄至黃州復經官兵截勦
殲斃甚多賊勢已挫第恐勦敗之後四散竄逸

亟應嚴行兜剿河南信陽等處業經署藩司鄭
敦謹前往派兵嚴堵臣亦卽日出省馳赴南陽
一帶相機調度前調山東山西精兵並直隸大
名鎮暨西安駐防勁旅均已先後抵豫現在統
籌進剿以遏賊氛奏入報

同日

上諭內閣曰琦善接奉疊次諭旨必當兼程徑赴楚豫
交界督同陳金綬籌辦防勦事宜毋用先行到省徐
廣縉已將岳州土匪勦除自己督兵赴援著卽與向
榮嚴飭各鎮將於大江南北分路兜勦黃州一帶毗
連江西安徽等處陸建瀛此時當已馳抵九江上游
著卽督同鎮將分扼水陸要隘毋任賊匪乘閒紛竄
徐廣縉陸建瀛琦善仍當隨時互相知照總期戮力

同心和衷共濟該大臣等身受重恩自必妥籌制勝
以副朕望也

十五日庚寅徐廣緝奏言臣行抵巴陵接據大營

稟報逆匪自到武昌分股四面滋擾自洪山至
南門外之江岸紮營數十座福興玉山蘇布通
阿之兵先後到齊卽經向榮商令徑逼東門外
之洪山紮營連日從長虹橋板橋一路轉戰而

進紮營於卓刀泉會勦於十一月二十三日合力進攻湖南貴州廣東四川之兵最爲奮勇首先搶至賊巢該逆分數隊出拒我兵奮勇攻撲斃賊不少餘仍奔回巢內當經向榮嚴申軍令整頓隊伍會各鎮將分路進勦二十八日湖南貴州廣東之兵直撲洪山當將賊巢攻奪所有賊營一律燒燬我軍直追至城下賊匪逃向江

岸因通漢陽之浮橋先被我軍拆斷賊無後路
仍退回死拒各鎮將督飭兵勇上前不敢收隊
等因查武昌城外之賊經此次痛勦自可解圍
惟占踞漢陽及水路之匪勢必聞風西竄臣惟
有督飭向榮相機設法渡江並令蘇布通阿馳
往漢陽上游遏其竄往荆襄之路奏入

上命軍機大臣傳諭徐廣縉向榮羅繞典常大湻陸建

瀛楊文定蔣文慶張芾琦善陸應穀曰逆匪自到武昌分股滋擾其陸路賊營占踞洪山一帶向榮督同福興等合力進剿將賊巢全行燒燬直追至武昌城下其漢陽浮橋亦爲我兵拆斷賊匪經此次痛剿省城當可解圍惟南岸之賊仍係分股其大股俱在水路及江北漢陽漢口等處難保不聞風四竄且賊情詭譎異常更恐以南岸之賊牽掣我師其大股復潛

圖他竄徐廣縉計已馳抵武昌前奏擬派蘇布通阿
馳往上游杜賊西竄之路此時是否已有布置著與
向榮迅速籌辦羅繞典此時是否已抵襄陽台湧荆
州兵單恐未能力遏賊鋒必須派得力將弁添兵防
禦陝西交界處所已諭令舒興阿等派兵設防務須
聲勢聯絡不可稍分畛域至江面下游一帶陸建瀛
計已統帶重兵溯流而上江西安徽水陸要隘防不

勝防惟有擇險據守確探賊蹤督兵進剿並隨時知
照張芾蔣文慶楊文定及江甯將軍祥厚一體嚴防
現在漢陽尙有賊踞孝感黃陂一帶均有賊營去豫
甚近情形更爲緊急琦善未到以前陸應穀計已馳
抵南陽所調直隸山東山西陝西各勁旅計亦趕到
兵力不爲不厚卽著陸應穀妥爲布置堵剿兼施並
隨時知照湖北軍營聯爲一氣毋得稍有推諉